

ŠKARPINA

(Dario Eterović- govor Pučišća, otok Brač, 4D Tehnička škola za strojarstvo i mehatroniku,
mentor Nađan Dumanić)

Kaić, muore i slabi meštro
Već san misli užgat ferol
Ma za lignje ni me puno ni brige
Nison se zato mako ol' đige

Zdravomarija zvoni, sunce pado
A jo bidan, škarpinu bi ji rado
Na voj pošti uvik san jemo sriće
PO i za brujet čagod večeras biće

Kančanica tone po kurentu
Po neću opet jist pulentu
Olovo dno zafrižalo,
Trzaj, kontra i grien doma pomalo

Ma kako se samo žvelto zabocila
I tunju mi iz ruke doboto izbocila
Al' ne balo 'na baš tako šesno
Tri paše livo pa dvi desno

Brige nju, na se molala
Jerbo je jagle zo me parićala
Crvenkasti koluri već se naziru
A meni suze ol' sriće naviru

Ma ni glovu maška dobit neće
Jerbo i to je delicija svako reće
Puno stimon kus ribe
Bodlje otkin i nimoš brige

Ni ol' komorčih, ni ol' zubacih
Ni ol' čarnila ni ol' racih
Meni slajega nimo ništa
I škarpinu ne bi minjo za išta